



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : Tir Yimiyim

tiryimiyim@aolima

tir yimiyim TAPAK 8



CM Sarma-i Assembly nung Assam Cattle Preservation Bill 2021 benok

Jacob Zuma tepuokdak ayuba mechi tensa tamajungba akumer



VOL. XVIII NO. 269 (ADOK 269) DIMAPUR

SANGTENNÜ (TUESDAY)

CHITENI (JULY) 13, 2021

₹ 5.00

58 Shamator-Chessore Assembly menden tazüing kümogo

Dimapur, July 12, 2021 (TYO): 58 Shamator-Chessore Assembly Constituency nungi MLA Toshi Wungtung ajungbena asüba ajanga iba Assembly menden tazüing kümogo, ta Commissioner & Secretary, NLA, Dr. P.J. Antony-i metetdaksü.

Asür Toshi Wungtung ya Information & Public Relations, SCERT aser Village Guards indang Advisor liasü aser July 1, 2021 nü New Delhi nung asü. Anungji July 3, 2021 nungi iba Assembly Constituency menden tazüing kümogo, ta Dr. P.J. Antony-isa ashi.

NLA Speaker-i BAC senden jateper

Dimapur, July 12, 2021 (TYO): July 23, 2021 anepdang 11:00 ako nung 13 buba Nagaland Legislative Assembly indang Session Tibuba indang Provisional Programme yanglutsü atema senden ka amentsü. Sendenji Committee Room,

Assembly Secretariat nung amentsü anungji BAC züingsem ajak adentsü mepishir, ta Nagaland Legislative Assembly Speaker aser Business Advisory Committee (BAC) Chairman, Sharingain Longkumer-i metetdaksüogo.

Dimapur nung Odd-Even Traffic System maneni alitsü

Dimapur, July 11, 2021 (TYO): Dimapur District nung July 17, 2021 tashi garitem ODD- EVEN system nung senzütsü ta Commissioner of Police, Dimapur, Rothihu Tetseo-i metetdaksüogo.

Even Number Day: Mongulbar, Brihostibar aser Honibar anogotem registration number 2,4,6,8 & 0 agi tembangba garitem dang senzütsü.

Odd Number Day: Hombar, Bodbar aser Hokolbar anogotem registration number 1,3,5,7 & 9 agi tembangba garitem dang

Taoba mapang tenokdangba kübok madenba ketdangsürtem aser Staff-i HoD ajanga agütsüba Identity Card bener senzütsü, ta Commissioner of Police-isa ashi.

NPCC-i cycle yatra ajanga lungkak aitogo

Dimapur, July 12, 2021 (TYO): Nagaland Pradesh Congress Committee (NPCC)-i totzü aser tang nungdakatem nung jenjang atuba anoma anogo trokbuba lungkak aitogo.

road - Circular road ajanga City Tower area tashi ao aser iba sülen Circular road - Dhoibinala jn - GS Road - MP - Road - Flyover adena DCC office-i meyipa aru.

Deobarnü NPCC-i Dimapur jila tiyongtsü nung anepdang 9:30 ako nungi 10:30 ako tashi Cycle Yatra ka ayonga agiogo.

Kohima nunga Kohima DCC-i anir teloktemi retail fuel stations nung mass signature campaign agia liasü. Kasa sentong ya District Congress Committees (DCC)-i Mokokchung aser Tuensang nunga ayonga agiogo.

"Iba sentong nung PCC office bearers, Dimapur DCC, NSUI Nagaland, AIPC Nagaland aser NPCC Minority Dept züingsemtemi Covid-19 inyakyim sülen anidaka shilem agi" ta NPCC communication cell sangdong ka nung metetdaksü.

"Tang nungdakatem aser totzü nung jenjang atuba anoma lungkak aitba sentong nung Nagaland Voluntary Consumers' Organization (NVCO)-ia pusema nungitba atema pelar. Maneni, tanga CSOs aser NGOs-ia nübertem timtemdaksüba atema ola adoktsü ayongzüker" ta NPCC-isa metetdaksüogo.

PCC President K Therie-i anir cyclist 12-i cycle rickshaw nung amen aser tanüingba züingsemtemi tetsüing agi jaja.

"Tang nungdakatem aser totzü nung jenjang atuba anoma lungkak aitba sentong nung Nagaland Voluntary Consumers' Organization (NVCO)-ia pusema nungitba atema pelar. Maneni, tanga CSOs aser NGOs-ia nübertem timtemdaksüba atema ola adoktsü ayongzüker" ta NPCC-isa metetdaksüogo.

Cycle yatra ji Hotel Acacia anasa aliba Dimapur DCC office nungi tenzüker Nyamo Lotha

Mkg nung maneni gari Odd-Even yimya nung jajatsü

Mokokchung, July 12 (TYO): Mokokchung Deputy Commissioner, Limawabang Jamir ajanga July 12 nungi tetuyuba tasen ka magütsü tashi maneni gari odd-even yimya nung jajatsü ta ozüing kümoga sangdongogo.

Municipal Area-i aittertem aser Mokokchung Municipal Area telungtet nung gari ajak odd-even yimya nung dang jajatsü. Tanabuba nung tanga state nungi chiyungtsü aser nungdakba osettsüset abenertembo iba ozüing jagi malentsü, ta metetdaksü.

Iba dak sentakba nungsa - tanga district nungi Mokokchung

(Maneni tapak 6 nung...)

Assam: Tekülem ki telongtet kilometre 5 nung nashi shi mayoktsü

Guwahati, July 12, 2021 (Agencies): Hombarnü Chief Minister Himanta Biswa Sarma-i assembly nung Assam Cattle Preservation Bill, 2021 benokogo.

Iba bill ya nashi tepsetba, shi achiba aser ozüing alema shibelenba azüoktsü nükjidong nung yangluogo aser ozüing kümoga Assam Cattle Preservation Act, 1950 melentsü.

shimtetba tesemtem dak alaka tanga tesemtem nung nashi shi mesüra nashi shi agi yangluba chiyungtsütem mayoktsü shia lir. Hindu, Jain, Sikh aser nashi shi machirtem aliba tesemtem mesüra tekülem ki, satra (vaishnavite monasteries) mesüra ketdangsürtemi shimba reju indang kilometre 5 telongtet nung nashi shi mayoktsü ta bill nungsa lateta lir.

Iba ozüing ajanga Assam ajanga kuli kaket tejanga melii nashi belenba noktanger. Anosa, "non-beef eating communities" aliba tesemtem aser tekülem ki telongtet kilometre 5 nung nashi shi ayoktsü memelar.

Iba Bill nungsa police ketdangsür mesüra sorkari shimba nisung mashi kati pei telongtet nung iba Act alema inyaksangshir ta temolung melemi bilemba tesem mita aotsü indang tashi agütsür. Assam Cattle Preservation Act, 1950 nungbo iba tashi ya sorkari shimtetba Veterinary Officer aser Certifying Officer nem dang agüja lir.

lakh tashi senchi achitsü akok. Ano, tanaben aibelenertem dang temerenshi anasü agütsütsü. "Iba Bill ya nashitem kümzüka ayutsü mesüra nashi akhümtsübuttsü atema masü. Iba ya Muslim nunger temolung yirutsütsü aser kintem talila lemsatsü atema yangluba dang lir. Onoki iba Bill magizüker aser yanglushitsü atema onüktem benoktsü merangtsü" ta All India United Democratic Front (AIUDF) MLA, Aminul Islam-isa ashi.

Opposition-i iba Bill nung temelenshitsu onüktem benoktsü ta metetdaksüogo.

Iba Act kübok aibelenertem küm 3 nungi 8 tashi tepuokdak ayutsü aser Rs 3 lakh nungi Rs 5

"Iba Bill nung khuret aika keta lir. Tatishitsü agi, kilometer 5 telongtet nung nashi shi ayoktsü memelar ta ashiba nungji bilemdangra, nisungtemi tesem mashii ka nung lung ka azünger tekülem ki yanglutsü akok. Anungji iba lendong keta lir. Iba ajanga telok balala tsüingda mepetmesü adoktsü" ta Congress MLA Saikia-isa ashi.

COVID-19 Nagaland: Nisung 4 asü, 76 dak putet

Dimapur, July 12, 2021 (TYO): Hombarnü Nagaland nung COVID-19 puteta alir nisung 4 asü, 76 dak putet aser 83 taneptsü angu.

Dimapur nung 10, Kohima nung 47, Mokokchung nung 10, Tuensang nung 6 aser Mon o Phek nung pungugu (5) lir, ta parnokisa ashi.

agütsüogo, ta State Immunization Officer, Dr Ritu Thurr-isa ashi.

"Tanü nisung 76 dak COVID-19 putet. Parnokji Dimapur nung 19, Kohima nung 5, Longleng nung 4, Mokokchung nung 22, Mon nung 6, Phek nung 1, Tuensang nung 11, Wokha nung 4 aser Zunhebot nung 4 lir" ta Health & Family Welfare Department-i metetdaksü.

Tanü tashi nung Nagaland nung nisung 26,052 dak COVID-19 aliba putetogo aser iba nungi nisung 23,858 taneptsü nguogo. COVID-19 puteta alir nisung 497 asü aser tang nisung 959 anepaludar, ta Health & Family Welfare Department-isa ashi.

Vaccine agirtemji frontline workers 60,311, healthcare workers 15,851, arishi küm 45 ser temapur 1,64,249 aser arishi küm 18 nungi 44 tsüingda alir 2,72,611 lir, ta paisa ashi.

Maneni, tanü nisung 83 taneptsü angu aser parnokji

Honibar tashi nung nisung 5,13,022 nem COVID-19 vaccine indang dose 6,04,782

"Vaccine agirtem rongnungi nisung 91,760-i dose anaprong agiogo. Parnokji frontline workers 31,617, healthcare workers 11,137, arishi küm 45 ser temapur 48,872 aser arishi küm 18 nungi 44 tsüingda alir 134 lir" ta Dr Thurr-isa metetdaksü.

Mkg nung dokan balala lapoktsü anogotem sangdonger

Mokokchung, July 12 (TYO): July 12, 2021 nungi July 17, 2021 tashi Mokokchung nung dokan lapokba aser business balala inyakeritem aser nüburtemi anitakttsü asoshi tetuyuba kar Mokokchung D.C, Limawabang Jamir ajanga ozüing kümoga metetdaksüogo.

hardware, electrical, electronics & repairing, stationery & variety stores, photo & Xerox points, steel fabrications-tem lapoktsü.

& bookstalls, bakeries, coffins & flower shops, food & medicine agencies, meat & fish (fresh & dry) stall & allied nungertem alitsü.

Dokan anogoshi anepdang 6:00 ako nungi nikong 4:00 ako tashi lapoktsü. Mondays & Thursdays anogo nung item dokantem lapoktsü - grocery, utensils, pan shops, betel nuts & leaves. Tuesdays & Fridays nü -

Wednesdays & Saturdays nü - grocery, garments & tailoring, cosmetics, furniture, motor parts & workshops, marble engravings, sports equipments, salons & parlors aser anogoshi (Monday-Saturday) item dokantem lapoktsü - milk & potable water carrier, vegetable & fruit stalls, LPG & Fuel stations, tyre repairing, telecom & recharge outlets, print/media

Iba den pharmacies, hospital, nursing home aser health clinic amalabo anogoshi 24/7 lapoktsü melar. Restaurant-tema home delivery service atema melar aser chiyungtsü tsüingdong bener otsüba - food delivery/groceries delivery aser tanga e-commerce service provider-tema melar, ta Mokokchung DC-isa metetdaksü.

Gadkari-i Manipur CM dang mapa shitak inyakttsü ashi

Imphal, July 12, 2021 (Agencies): Union Road Transport & Highways minister Nitin Gadkari-i Manipur nung mapatong balala inyakba nung temolung masüba metetdaksüogo.

Mapa shitak inyakeritem ni meimer. Khuretttem aliba ni meteta lir saka lenisüba tetezü angatetsüla. Asenoki khuretttem koktettsüla aser ibaji lenisüba lir. Khuretttemji koktettsüla aser mapa tekaraba nung inyakttsüla" ta Gadkari-i yimjak nung Biren Singh dang ashi.

Nitin Gadkari-i Manipur nung National Highway project 16 tashi lapoktsüogo.

Iba atema Nitin Gadkari-i Manipur chief minister Biren Singh merenshi.

Hombarnü Union Road Transport & Highways minister

National Highway project 16 ya kilometer 298 indang lir aser Rs 4148 endoka yanglutsü.

"Manipur-i rongsenketzüng nung tashitait state ka akümtsü alizüing ayuba nung Centre-i yariteper" ta Union Minister Nitin Gadkari-isa ashi.

Covid-19 tashidak nokdangtsü atema senso shia teinyakttsü asem :

Tangar alidak teti teni tebang nembanga mask temerük agiang;

Tangar den tsüktepa tenokdak aser temen;

Teti sapon agi teka metsükang.

Peren nung coffee agütsüba tesem ka mesemtetogo



Dimapur, Chiteni/July 12 (TYO): Department of Land Resources ajanga District Project Officer, Office, Jalukie nung "Steaming Mugs" nungia agütsür Coffee Bar ka amenokba tanü (July 12, 2021) Deputy Commissioner Peren, Sentiwapang Aier, NCS ajanga semzükja liasü. Iba sentong nung Agri & Allied Department tem nungi ketdangsurtem arua dena liasü.

Department ajanga iba ama sentong tajung yangluba atema Deputy Commissioner ajanga

tenünsang agütsü, kong coffee temaba jenjangi ajungketba kisung masü saka nüburttem anisungzüka kazütsü aser mapa jangratema inyaksü tesem agütsür, ta ashi.

Süngtong-litong meyokdang tajung-tamajung metettsüla aser nodal department nungi teyari bushitsüla, ta pai ajungshi. Pai department dang coffee temaba jenjangi ajungkettsü aser market linkages yanglutsütsü ajungshia liasü.

Paisa Peren jila nung aliba coffee entrepreneur dang tezü

matangtsü ayongzüka liasü.

Iba sülen Deputy Commissioner den ketdangsurtemi District Project Office kima Permaculture garden semdang aser department dang DC Bungalow, Peren nunga Permaculture garden ana yanglutsütsü asungdanga liasü.

DPO, Alemla Aier ajanga state nung coffee plantation indang tongmelang agi rateta shia liasü. Laisa coffee agi lenmang balala nung tajangzük anguba aser tarutsü nükla indang lemsatepa liasü.

DoSE ajanga nenshia metetdaksür

Dimapur, Chiteni/July 12 (TYO): Sorkar ozüing nung aliba ama Department of School Education kübok establishment/school tem nung sorkar mapa inyaker ajak dang, ketdangsur tejangja nungi Station Leave Permission memeshi tashi Headquarter station yutsür maotsüla, ta Principal Director, Directorate of School Education, Shanavas C, IAS

ajanga sangdong ka nung nenshia metetdaksüogo.

District Education Officers, Sr. Sub Divisional Education Officers, Sub Divisional Education Officers ajak aser Government Schools ajak nung tekolakpur tem dang iba totuyuba nung aibelenba metetra Sorkari süoki ia agitsü aser aibelenem nung mapa nungi anentsüba densema tapet temerenshi agütsütsü, ta

pai ashi.

Maneni Government School ajanga indang Head tem dang Directorate of School Education ajanga taoba mapang sangdongba ama agüja aliba mapang tatakzük tsüngta 'Teachers Attendance' densema 'Daily Reports' tem School Monitoring Portal nung upload sütsütsü metetdaksür, ta sangdong ajangasa ashi.

Sovima Village Council tasenba tentetogo



Dimapur, Chiteni/July 12 (TYO): Sebastian Zumvü chairman sür 2021-2026 kümsük atema Sovima Village Council team tasen ka July 12, 2021 nü tentetogo.

Hombarnü Village Council Hall nung Sovima Village indang Head GB, Thepfukeduo menden sür agiba senden nung team tasenba ya GB aser Village Council züngsemtemi molungtepa shimtet, kong Ruokuosilie Rupreo ya general secretary, Khrieketoulie ya Joint Secretary, Lhouvisakho Punyü ya VDB Secretary aser Neihutuo Rupreo ya Treasurer shimtet.

Senden nung o tatsüka jembiba mapang team tasenba

indang sentongtem kar chairman Sebastian Zumvü ajanga lemsatep, aser item rongnung telemtetba balala agiba sabang nung tetsür aser lanurtem timbai shilem agidaksütsüba densema liasü.

"Tetsürtem ya nütsüing yongsük shilem 50 jungnüa lir aser parnok tebur den sako lir. Anungji yimtsüing atema telemtetba agiba nung parnoki ashitsü aser inyaksü jenti lir," ta pai ashi.

Lanurtem ya yimtsüing tarutsü nükla lir, anungji parnok tarutsü jenjang aser tia alangtettsü atema parnoki koma aginer, aji parnoki ashitsüla, ta Zumvü-i ashi.

Sovima nung jana-reja/plastic samadakja yimtsüing temürek kumdaksütsü aser süngtong-litong tema süngtong tilatem anepalutsü, ta pai ashi.

Paisa yimtsüing nung lenirtem dang team tasenba indang sentongtem asangsang akumtsü asoshi maneni nungita yaritsü ayongzüka liasü.

Yimtsüing nung yimtsü-yimbo temi pa dak tamang katetba aser temolung lemtetba atema pelaba lemsatepba mapang VDB secretary tasenba, Lhouvisakho Punyü-i nüburttem dang yimtsüing temaba jenjangi ajungkettsü asoshi lenmang sayutsü aser sarasademtsütsü ayongzüka liasü.

Dhansari ayongnungi tasü mang ngutetogo

Dimapur, Chiteni/July 12 (TYO): SDRF Dimapur personnel den Bade aser Tsithrongse yimtsüingtem nungi volunteer temi Dhansari ayongnung arakseta sür aliba arishi küm 28 tain, Kuthoveyi Choi temang July 12, 2021 anüngdang 12:30 ako meta

nguteta liasü, ta sangdong ka ajanga ashi.

Asür Choi ya Bade yimtsüing nungi aser Rangapahar nung par medemertem ajurur kidangi meyipa shilangba mapang July 10, 2021 nü Dhansari ayongnung tziü agi ponger ao, ta osang ajanga ashi.

Tanü Kohima DTF senden amentsü

Dimapur, Chiteni/July 12 (TYO): Kohima District Task Force on COVID-19 pur senden ka July 13, 2021 nü Deputy Commissioner, Kohima indang Conference Hall nung nikonngdang 2:00 ako nungi amentsü,

ta sangdong ka ajanga metetdaksü.

Iba dak sendakba nung Deputy Commissioner & Chairman DTF, Kohima, Gregory Thejawelie NCS ajanga züngsem ajak medema arua adentsü metetdaksü.

Kohima nung Odd-Even system maneni alitsü

Dimapur, Chiteni/July 12 (TYO): Taoba mapang sangdonga aliba ama Deobarnü dak alaka tanüngba anogo ajak nung Motor Vehicle Act 1988 indang Section 115 agi melaba ama Kohima Municipal Area kübok nija garitem 'Odd-Even' yimya nung jajatsü, ta Deputy Commissioner Kohima, Gregory Thejawelie NCS ajanga sangdong ka nung metetdaksü.

(1, 3, 5, 7, 9) agi tembanga alirtem jajatsü melatsü.

2. **Even Number garitem:-** Mongulbar, Brehostibar aser Honibar anogotem nung gari registration Even number (2, 4, 6, 8, 0) agi tembanga alirtem jajatsü melatsü.

Iba totuyuba nung aibelenem nem Motor Vehicle Act 1988 indang Section 177 & 179 kübok temerenshi alitsü. Iba totuyuba nung nüburttemi tang nungi tenzüka July 17, 2021 tashi anidaksü metetdaksür, ta sangdong ajanga ashi.

1. **Odd Number garitem:-** Hombar, Bodhbar aser Hokulbar anogotem nung gari registration Odd number

July 19 nungi tenzüka Video aser Audio lesson tem sayutsü

Dimapur, Chiteni/July 12 (TYO): Class I nungi IV nung azünger kaketshir atema Doordarshan, Kohima, All India Radio, Kohima, Youtube Channel (DoSE Nagaland) aser Facebook (School Education, Nagaland) ajanga Video aser Audio lesson tem sayuba Phase I Broadcast ya July 19, 2021 nü nungi tenzüksü, ta Directorate of School Education ajanga sangdong ka nung metetdaksü.

resources tem lemsatepsüla.

3. DEOs/Sr. SDEOs/SDEOs ajaki District Administration, School Authorities, Village Education Committees, NGOs, Students Unions, Arogo aser temolungretem den amteper kidang Television/Computer/ Smartphone/Radio maliba kaketshirtem ajangzüksü atema community resources tajungtiba nung amshitetsüsa achayangtsüla.

4. Tele/Radio Online Education programme tem den yarisema Govt. School indang Head temi tesayurtem indang services amshitsüla.

Kaketshirtemi yimya balala nungi iba broadcast amshiba indang data bendentsüla aser meshiba mapang agütsütsüla.

5. Class V nungi XII atema iba mesükba sentong ya yakta tenzüksü. Aji masü tashi tesayurtemi kaketshir dang 2020 küm broadcast asüba Video lesson tem amshia atatsü ajungshitsüla, koba Department indang YouTube Channel aser Facebook Page nung angutsü.

Matamabensai aliba tanurtem ajangzüksü asoshi video broadcast nung sign language amshia lesson meyipzükba inoka lir, ta sangdong ajanga ashi.

Iba dak sendakba nung ajaki inyaksü atema totuyuba kar agütsügo, aser itemji:

1. School ajak (Govt. aser Private) nung tekolaktemi pei school nung azüngba tanurtem indang tsüraburtem dang Doordarshan, YouTube, Facebook aser All India Radio amala nungi lesson sayuba indang jungjunga angatetdaksütsüla, aji asünung dang parnok azünga aliba mapang item broadcast ya angutsü.

2. Item broadcast yagi kaketshir ajanga ajangzükdaksütsü mechi Govt. School nung Heads temi school nung aliba resources ajak kanga junga amshitsüla. Area/region ka nung Govt. School tem indang Head temi pei school tem nung

Mkg nung maneni...

(TAPAK 1 NUNGI...)

District telungtet nung chiyungtsü aser nungdakba osettsüset abener aser temelaba kaket (valid permit) bener jajartemiba ozüing jagi malentsü. Iba den ano Govt./Private gari shirnok tongtibang nungdak asoshi jajar mesüra covid-19 duty/medical emergency asoshi jajar, parnokjia iba ozüing jagi malener, ta Mokokchung DC-i yokba ozüing nungji metetdaksü.

12th July, 2021 nungi order tasen ka magütsü tashi gari odd-

even iba amai lemsar jajatsü:

Mondays, Wednesdays & Fridays: Gari registration number 1, 3, 5, 7, 9 agi tembanga alirtem aser Tuesdays, Thursdays, Saturdays anogotem nung registration number 0, 2, 4, 6 & 8 agi tembanga alirtem jajatsü, ta Mokokchung DC-isa metetdaksü.

Item ozüing nung manitakerem senchi alitsü, ta Mokokchung D.C-i yokba ozüing nungsa shisema liasü.



Assam assembly indang Budget Session tenzükba anogo nung opposition MLA ajaki lungkak aita kimai alu. Opposition MLA temi totzö aser kechisarena nung jenjang atuba onük jembitsü asüngdang saka Assam assembly Speaker-i magizükba atema tejashi sayua parnoki senden nung maden. (Guwahati, July 12)

CM Sarma-i Assembly nung Assam Cattle Preservation Bill 2021 benok

Guwahati, July 12, 2021 (Agencies): Hombarnü Assam chief minister Himanta Biswa Sarma-i Assembly nung 'Assam Cattle Preservation Bill 2021' benokogo.

Assam Assembly Budget Session indang mezüing anogo nung olemteptsü atema Assam Cattle Preservation Bill 2021 benoka liasü.

Taoba mapang assembly nung iba Bill metetpelatsü atema Assam Cabinet-i agizük.

Iba Bill ajanga "state adena nashi belenba maparen ajak nokdangtsü asoshi osang tejangja agütsür"

Ozüing alema Bangladesh-i nashi shibelenba maparen

anentsütsü nükjidong nung iba Bill benok.

Kasa mapang Assam sorkar indang 'cow protection bill' benokba ajanga nashi shi achiba northeast state tem asoshi tebilemstsü bentsür aruogo.

Northeast state temi Assam ajanga nashi bener arur. Ajisüaka, Assam nung iba bill agizükra tanga northeast state nung nashi shi peria mangutsü.

Assam nung 'cow protection law' ajanga State-i nashi belenba maparen nung timtem adokdatsüra Meghalaya sorkari jembitsü, ta Chief Minister Conrad Sangma-ia metetdaksüogo.

"Assam-i iba bill agizüka aser anidaksü tenzükba sülen, onoki iba temzüing asadangshitsü. Parnoki koba yimya nung iba bill benoka mapa inyakdir onoki repringdangtsü. Iba Bill nung renembatem mangu tashibo ni kecha ashitsü makok" ta CM Sangma-isa ashi.

"Ajisüaka Meghalaya rongseketzüing nung timtem adokdaksütsüsa iba bill ajanga timtem adokdaksüra, Assam Sorkar aser Center den jembiteptsü," ta paisa shisem.

Meghalaya nung ajaki nisungtemi nashi shi sapua achir aser linük tesem balala nung nashi ajak Assam ajanga bener arur.

Pasighat jail nungi nisung 7 jena ao

Itanagar, July 12, 2021 (Agencies): Arunachal Pradesh nung Pasighat judicial jail nung puoka ayur nisung 7 tashi jena aoba sülen bushir.

Deobar nikongdang 6:30 ako meta chi chiyungtsü atema lock-ups lapokdang parnok jena ao.

Parnokji Abhijit Gogoi, Taro Hamam, Kalom Apang, Talum Panying, Subash Mondal, Raja Tayeng aser Dani Gamlin

nunger ta jangjaogo.

Chi chiyungtsü atema lock-ups lapoktsüdang parnoki tanükertem dak teka sangshi. Parnokisa tanükertem dak chili aser pepper powder paloktsü. Iba mapang police 5 tshi yiru.

Parnok nisung tenet jagi Head Constable Rajesh Lego dak dala agi tekolak nung kholoktsüdang pa kanga mejungi yiru. Maneni, tanükertem- RK Kambhari, O

Taying, Tago Tatung aser Tapi Tali nungertem yirua lir.

Arunachal Pradesh nung Pasighat Police-i parnok nisung tenet aputsü atema bushitepdar aser IRBn densema police-i Pasighat nungi aolen ajak shibangogo.

"Tepuokdak nungi jena aoertem kobi melii aputsü" ta Deputy Superintendent of Pasighat Police, Tapang Tatak-i ashi.

Itanagar nung July 20 tashi lockdown atsülanger

Itanagar, July 12, 2021 (Agencies): Coronavirus wara menashia aoba nokdangtsü atema, Arunachal Pradesh Sorkari Itanagar nung total lockdown alitsü asoshi telemtetba agiogo.

Deobarnü, Itanagar DC Talo Potom-i anir senden ka agiba mapang iba telemtetba agia liasü.

Covid-19 tashidak puteter timba küma aoba asadangteta, Itanagar nung July 20 tashi lockdown atsülangtsü asoshi state sorkari iba telemtetba agi Chief Secretary Naresh Kumar-i ashiba agi, iba cabinet-i Itanagar, Naharlagun, Nirjuly aser Banderdewa nung lockdown atsülangtsüogo.

Pai ashiba agi, Itanagar nung tsüingsarüsa dak sendakba nung mera kar salatsüba dak alaka taoba mapang latetja aliba lockdown tetuyubatem nung maneni anidaksü.

* Lockdown atsülangba mapang melaba aser memelabatem:

- Colony balala nung anepdang 5:00 ako nungi 9:00 ako tashi grocery dokantem lapoktsü melar.

Ajisüaka, nungdakba osettsüset belenba gari tulu ajak Itanagar kübok Banderdewa check gate adena aittsü melar.

- Nüburtem senzüsembongba memelar. Medical rongdak nungdak atema Itanagar Deputy commissioner office nungi temelaba agir sülen melatsü.

- Shishilembaba tesem ajak shibangtsü. Ajisüaka, private establishment talisa banks, health facilities, press, pharmacies, telecommunication, internet services, broadcasting aser cable service densema industry tem staff ishika dena lapoktsü asoshi melatsü.

- Quarantine facility aliba Hospitality establishment tem dak alaka tanga establishment ajak shibangtsü.

- Tekülem tesem ajak maneni shibangtsü.

- Asüpila sentong nung nisung timba agia 20 tashi adenshitsu akok.

- Finance department aser deputy chief minister indang office tem lapoktsü

Doomdooma Police-i nisung asem apu



Guwahati, July 12, 2021 (Agencies): Hombarnü Doomdooma Police-i temesepba mozü shibelener nisung asem apu aser parnok ket nungi brown sugar gram 690 ngutet.

Tinsukia district kübok Doomdooma jila nungi police-i pua alir nisung asem ya Amod Shah, Munna Sahani aser Sunil Das nunger ta jangjaogo.

Tinsukia superintendent of police, Debojit Deori-i ashiba agi, "Osang tejangja angazükba sülen, Doomdooma police station nungi police team kati Doomdooma jila overbridge len mita ao aser temesepba mozü shibelener nisung asem apu."

"Parnok ket nungi temesepba mozütem apu" ta Deori-i ashi.

Doomdooma police station indang Sub-Inspector,

Chittaranjan Buragohain-i ashiba agi, pua alisang Amod Shah ya Doomdooma tesem nung temesepba mozütem shibelenba maparen nung nübu tongti ka liasü aser pa ajanga customer tem dangi temesepba mozütem yoker.

Narcotic Drugs and Psychotropic Substances (NDPS) Act indang arlla balala kübok par asempronlga anema ken o benokogo.

Tawa tashi nung Tinsukia Police-i kanga nendaka inyakba ajanga, brown sugar aser ganja jenti apuba dak alia temesepba mozü shibelener aika puogo.

"Temesepba mozü shibelenba maparen nokdangtsü atema onoki maneni inyaktsü. Temesepba mozü achi-ajemba aser shibelenba maparen nung lanur aika dena lir," ta Deori-isa metetdaksü.



Hombarnü Union minister Nitin Gadkari-i Manipur nung Rs 4,148 crore endoka national highway project 16 inyaktsü lapoktsüogo. (Imphal, July 12)



TIR YIMYIM YIMOBILEM (EDITORIAL)

DIMAPUR SANGTENNÜ, CHITENI (JULY) 13, 2021

Nashi shi mangutsüa akok

Tawa Assam nung government tasen akümba metemeteta Assam kidanger state-tem nung timtem atalok tenzükogo. Item timtemtem rongnung kaji, likalim arrtsü raktepba aser ano kaji, kidanger state-tem nung sapua achiba chiyongtsü dena mangu akümtsüsa özüng latettsü merangba mapatem asütsü. Atangji, arrtsü ken o yabo küm aika melatetteti aruba tejen tebilemtsü ken o ka lir, saka Assam nung Chief ministerbai machiba chiyongtsübo kidanger state Nagaland, Meghalaya aser Mizoram nungertema machitsüsa özüng latettsü merangbajibo alima nung pa kisüng, pa sünütsü süa alitsü merangba nisung ka asütsü. Tang Assam Chief minister, Himanta Biswa Sarma ya nashi ya tsüngrem ama bilema külemba tamangba yimsü dak kanga ketasena amanger ka asütsü, iba jagi pai par lima nung nashiji tsüngrem ama külema anepalutsüba dak alaka metepsetdaksüner. Iba tashi nungji kecha tali mali, kechiyong ibaji par tamangbaren, anungji asenokia akümtsübuttsüla. Ajsüaka, tamangba yimsü ajak kasasa akhümtsübuwa agizüka amangba lima, India lima ama ka nung, pai amangba tamangba yimsü agi memelaba chiyongtsübo tangartema machitsüsa özüng latettsü merangbajibo tim masü. Aji oda, Assam tatar senden nung Assam nung nashi metepsetsü aser Assam nungji kechalenia nashi shibelena meyoktsü ta özüng tasen ka latettsü merangba osang angashia, Meghalaya Chief minister, Conrad Sangma-ibo Assam ajanga mesüra Assam nungji Meghalaya state-i nashi bener marutettsüsa Assam nung özüng latet nungbo, iba özüng anema pai center nung ken o benoktsü ta metetdaksüogo. Assam tatar senden nung nashi maleptsü özüng mazüngdangyongi Nagaland nungbo nashi shi agi kanga anüngakonga kümogo. Iba jagi nashi shi jenjanga tuogo aser shi alepertem aika mapa maka kümogo. Kasaji Meghalaya nunga ataloka alitsü aser shitakba Assam ajanga nashi mebendaksü nungbo, Meghalaya nung dang masü saka Manipur, Nagaland aser Mizoram state-tem nunga nashi shi mangutsü, anungji nashi shiji özüngi memelaba chiyongtsü amato ka kümadoktsü. Aji oda, nashi shi chinürtem asoshi nashi shi manguba timtemjibo tilaka dang asütsü, saka tang nashi shi lepa kibong mesürtem, nashi shi ayokba chiyongdak lapoka alirtem aser nashi shi agi chiyongtsü tapu balala yanglua ayokertem aika mapa maka timtemi aitsü. Ibaji yimdangi arua shisabolua bilemba agi, asangsang nung matalok dang, Conrad Sangmaibo Meghalaya nung nashi shi mangutsüsa shingai menokdangtsüla ta ola adok tenzükger. Pa olaji Meghalaya state asoshi dang masü saka Northeast state-tem, talisa, Khristan state-tem ajak asoshi asütsü. Khristan-tem asoshibo shitakba Laishiba achitsü melaba shitem rongnung nashi shi ya tongtibangtiba chiyongtsü ka lir. Anungji, kodang Nagaland nung nashi shi mangutsüsa Assam nung nokdangdir, iba jagi Naga nungger aika takoksa tiai aitsü. Asenok ya tangar den külemi alima nung taküm alir ser nung, linük nung asenok akoksatsüsa, center government mesüra tang amaji, state government-i asenoki meteta özüng yangluaka ola madoker. Aji oda, asenok Nagaland nungbo gari totzü jenjang nung sen atuba ya anema, Congress telok tenüng nung nisung ishikati ola adokba dak alaka shingai ola madoki pelashishia agütsür amai angur. Ano, linük nung center government-i aluyimertemi züsentetba chiyongtsütem ayoktsü atema özüng tasen latetba anema linük ajunga nung aluyimertemi ola adokaka, asenokbo tang tashi zaka masü lir. Iba kasaji asenoki kanga sapua achiba nashi shi Nagaland nung mangutsüsa nokdangtsü Assam tatartemi jembir saka iba jagi asenok mulung nung mekongshir. Asenok ya kanga tetamatsü nisungtem lir. Asenoki kanga nendaka bushiba mapaji ana dang lir, kaji mapai mao ita sen achitsüba government mapa aser ano kaji, mapa meinyaki manger sangwa nung takar akümtsü asoshi sen bushiba mapa. Mapa ana atemajibo, ashiko, asenoki nashi shi machia aremtsü südi, iba jagi ola madoker asütsü. Tanü putu nungbo koba lima nung südir süaka, tetsür tebur ta masü, sensaker takar, tilar tular ta masü saka senso kati pei lima nung latetba özüngtem agi nübertem koma ajangzükger mesüra akoksar ta asüba indang kisüng masü saka tangar lima aser tanga state nung yimsüsürtemi latetba özüngtem agi asen lima tashi aruagi koba tashi ajangzükger mesüra komaka akoksatsü, item ajakji wainshin meteta angatetsüba kanga tongtibang aser tim masüba özüng aser mapa anemabo ola adoktsü tim. Tang ama nashi shi mayoktsü atema özüng latetba mapang nashi shi achirtemi ola madokra, tanabuba özüngjibo, ashiko, nashi shi achirtemi amangba tamangba yimsü shingai magizüktsüla aser mekümlentsüla ta linük ajungalen özüng sashisashia latettsüa akok.

OLEMSABANG

KINUNGTSÜ ASER KINUNGBOKÜLEM-SANNÜKER MAPA

~ Imnabenla Jamir (Bangrapet)

Okila

Asenok kanga karamelenshiba lima ka nung alir. Khristan yimsü aruba, shisaluyim balala, rongsen ketsüng maparen balala, aser tangar shilu den meyoktepa alitsüba putu ka nung alir asü nung asen tetsü-tebou benshiba sobaliba maparen aika melenshiogo. Tematiba degree tashi tetsürtem aikati tongteta azüngba ajanga yimden-yimli maparen aika nung takok ngua inyaka arudagi. Tamangba yimsü nunga takotet lenir tajung aika adokogo. Tetsür Laiputishir jendi adokogo; yimsüsür takotet jendi adokdagi. Asen Naga kin rongnung, tat. agi, Konyak, Chakeshang, Sema nunggerbo yimtsüng putu menden nunga tetsür shima anir aor. Saka Aor Jungliyimti putu sobaliba nungi mainshili ta asür. Yimtsüng putu mendenbo yutsür, arogo nunga sünga tetsür pastor inyaksü ashishir; yimtsüng arogo kar nungbo tetsür deacon shimtsü ashishir. Anungji tarutsü putu asen jalatem jenjang yanglushitsü nungdak aser ibailokti aser arogo nung ochimashi mapa ka aser melenshitsüla ta ajiteta Yanglushidi Sensaksem Sabang (YSS) nung onük benoka jembir aser tejembiba nungi bilemdangtsü asoshi olen kar lemsateper.

Aotsür tenzükba jenjang

Ao arogotem nung Aotsür tenzükba jenjang tekübokti jenjang nung yuja lir ta ashitsü akok. Kin isab theology azünger asadanga, India nung Aotsür ya theology azünger teimtiba asütsü. PhD/DTh azünger ajak agi Aotsür 19 aser tang tezüngdak, thesis submit sür result atatem ajak meyokteper 18 lir. Tang Serampore kübok Doctoral Dean-ji Aotsür. MTh, MDiv/BD, BTh ta azünger ajak meyokteperbo merijang ka shi. Aotsür karbo National aser International level tashi nung leadership agüja arur, saka Ao arogo nungbo tanü tashi tim shilem tetsür nem magütsür. Akhi putu yimtsüng yimsüsüba amai dangarogo maparen nunga bener odi aser ibai Lai tesayuba masü ta angatetdi. Arogo nung ochimashi tulutiba kaji tetsür nem tim shilem magütsüba yaa ka ta metetdi.

Khristan yimsü arur, Ao arogo küm 150 (2022) ajunger, saka tanü tashi tetsür ana Pastor inyakdanga dak alaka, arogoi tetsür meshimer. Mungdang nung tanü tashi Executive Secretary tetsüri inyakdanga mali, Women department nung secretary inyakba dak alaka tanga department nung tetsür kata tanü tashi inyakdanga mali. Asenoki metet, arogo ajak nung tetsür tenzükba shilem Sannüker Temetanger (Associate Pastor - Women) mesüra Tila Tanur anishitsü (Education Director) dak alaka arogo nung tongti shilem magütsür. Kechiba arogo nung tongti shilem magitsüsa nokdangger? Ya Aotsür tangar memenepeba agi masü, saka arogo yimden yimtsüng putu menden amai dang bener odi ta asüba ajanga adoker. Alima ajak nung tetsür-tebur ajak kasa shilem agiba angutsü anungji tanü tetsür tenzükba mapa nung sadema magitetbaji ochimashi inyakyim ka ta angatetdi.

Kodang theology azünger Tsüngrem tenzükger ka den, tat. agi, Pastor ka den kibong kümra mapa inyaksü shibangadoker. Tanga lima nung ama co-pastor shimdi ta mejembir. Arogoi mapabo magütsür, saka secular mapai ira, mesüra business tera inyaker, lokti nung tejendokba nisung amai ajir aser aitsür. Arogo nung employment peria maliji theology zünger, talisa tetsür, mapa maka aika lir. Yamaji lira bendanga agüja mazüngba agi mapa mali kazür ta jembitsür; mapa adokaka tetsürbo meshimer. Süra Aotsür theology azünger jenjang kong lir? Tanga lima nung ama kinungtsü aser kinungbo külem-sannüker (co-Pastor) sütettsü asü masü? Lenir kati yamai langzü, "Asen Ao/Naga arogo joko küm 149 tain akümdang, Co-pastorji agizüka inyak nung Tsüngrem tenzükba nung tetsür-tebur tebandang mali ta aser ochi mapa (justice) sayutetba ka asütsü."

Kinungtsü aser Kinungbo Külem-Sannükba mapa

YSS nung tanü atema dang masü, saka tarutsü nung asen jalatemtenzükba maparen nung tetsür-tebur telemsa makai liromedema aotsü asoshi "Külem-Sannükba" (co-pastor) mapa ya apettsü asü masüta lemsatep. "Külem-Sannükba" ta asüba ya kinungtsü nem honorarium tera agütsür, mesüra kilir teyarir ayuba tangatetba nung ama masü, saka ochi mapa inyakba, Lai tesayuba atalokdaksüba mapa amai angatettsüla. Ya apu-ani anaprongla sannükba khuret saku agütsür inyakba tsütsü nungi angatettsüla.

Hau, "külem-sannükba" mapaji kibong ajak nungbo mapettsü, kechiba süra (a) kinungtsü mesüra kinungbo ka arogo nung tenzükger, aser ka secular mesüra mapa tanga inyaker ta lir; (b) kibong kar nungbo ka arogo toklang tenzükger, kabo kecha meinyaki yariteper; (c) kibong kar nungbo ka toklang tenzükger, aser ka taah kecha magi music, youth, arogotsü, sarasadem telok, Sunday School nung yariteper; aser (d) kibong kar nungbo kinungtsü aser kinungbo anaprong kasa theology zünger sempet tajung akaba nübu lir. Par kibongji "Külem-Sannükba" inyakdaksü nung arogo leman aisü nung nübur aser arogo tajangzük angutsü aser tenzükba nung tashi taitba bener otettsü. Temalen Narola McFayden-i Laishiba tamendak aser koma inyaka aotsü tejanga shir asü nung itemji melepshir. Iba "Külem-Sannükba" mapa ya inyakteta ao nung "Tebur dang Pastor" ta asüba tangatetba mulungsentsü ya tarutsü nungbo melenshia aotsü imlar.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Indian Orthodox Arogo nung tongti Baselios alima nungi pilaogo



Kerala Chief Minister, Pinarayi Vijayan-i Indian Orthodox Arogo nung tongti, Baselios Marthoma Paulos II ajurudang tangokba tejen noksa ka yangi angur.

Kottayam (Kerala), July 12 (Agencies): Malankara Orthodox Syrian Church of India tongti, Baselios Marthoma Paulose II, July 12 anepdang alima nungi pilaogo; pa arrshi küm 74 liasü, ta Arogo otongdar kati metetdaksü.

Pa akümli mapang nung pai sensakertem aser meshimejungertem atema inyak aser Arogo nung temelenshi aika adokdaksü.

Kerala nung Pathanamthitta district kübok Parumala nung aliba nija hospital ka nung pa treatment tagidak mapang Hombarne 2:35 ako nung asü; pa coronavirus tashidak agi shirangerba anepba sülen temang nung timtem liasü, ta Arogo otongdarisa metetdaksü.

Hospital ketdangsertemi ashiba agi, Amongnü anepdang nungi pa temang tamajungba aküm.

"Artificial ventilation ajanga pa nem oxygen agütsüyonga azü nung oxygen junga memeyokteptet. Nikongdang tashi nungbo pa tangu junga mesashiteti liasü," ta Hospital ketdangsertemisa metetdaksü.

Pa dak cancer tashidak putetba mapang nungi pa St. Gregorios International Cancer Care Centre, Parumala nung monga liasü.

Pa 2019 küm December ita nungi tepokpok cancer agi shiranga liasü aser taküm coronavirus tashidak menaba sülen February ita nung anep.

Pa asüba sülen Kerala Chief Minister Piyarayi Vijayan aser Ato kilonser, Narendra Modi na densema lenirtem aikati pa asüba mangyim jashi lemsatepogo.

Ato kilonser Modi-i twitter ajanga, "Indian Orthodox Arogo nung tongti Moran Mar Baselios Marthoma Paulos II asüba osang angashia jashir. Pai temeim agi nüburttem tenzuka liasü. Tang ama

mangyim jashi mapang nung ni Orthodox Arogo züngsemtem den mangyim jashi lemsateper. Asür tanela tesünep nung anisüngzükang ta sarasademtsür," ta lemsatep.

Moran ya 1946 küm August 30 nü Kerala nung Thrissur district kübok Mangad nung aso. Pa Theology azüngba sülen pa arrshi küm 36 asüba mapang nung Church Parliament (Malankara Syrian Christian Association)-i pa putir shima liasü.

1985 küm pa nem tenüng tasen- Paulose Mar Milithios jaloktsü aser Kunnamkulam Arogo mezüng tentetdang yangji Metropolitan shima liasü. 2006 küm pa Catholicos Designate shim.

Pa meimertemi pa dang "Bava Thirumeni" ta aja; pai temeim mapa jenti inyak aser secular tangatetba nung nokdak.

Pai Arogotem tsüngda tesendaktep tajung ayutsü atema inyaka aruogo aser Arogo anema inyakba mapang nungbo pai odi-odia sorkar aser yimtenren party tem aitsü.

Arogo kübok pai sensakertem aser meshimejungertem atema sentong aika ayongzuka katsü aser Arogo nung tetsürtem nem-a tim shilem agütsüba den külemi Arogotem nung tetsürtem nem vote temeden agüja liasü.

Pa Indian Orthodox Arogo nung tongti asüba mapang nung Orthodox aser Jacobite na tsüngda mangatettep ken o benteta Supreme Court-i obendang agüja liasü.

Arogotem tsüngda tesendaktep tajungba akümstü nükjidong nung pai Oriental Orthodox Arogotem nung tongti lenirtem den aiben senden mena liasü. Pai Malayalam oshi nunga osangtajung kakat aika zülua liasü.

Pa asüba mangyim jashi lemsatepa Kerala Chief Minister, Pinarayi Vijayan-i "Baselios Marthoma Paulose II ya tongmelang nisung ka liasü aser pai sensakertem den külemi ali," ta ashi.

Arogo nung tetsürtem nem lenisüba shilem agidaktsütsü atema pai tongti shilem agia aruogo, ta Chief minister-isa metetdaksü.

"Pai Arogo nung aser loktiliba nung yimjung alitsü atema inyak. Baselios Marthoma Paulose II-i ainakar ka ama liogo aser pa asüba ya loktiliba atema takoksa tulu," ta Chief Minister-isa ashi.

State nung minister aser MLA tems, Congress lenir aser taoba mapang Union Defence Minister A K Antony aser BJP state Tir, K Surendran nungeria mangyim jashi lemsatep.

Arogoi ashiba agi, pa den asüpila sentong Mongolbarnü (July 13) nü agitsü.

Taküm India nung Khristantem anema inyakba tatalokba 154 liasü

New Delhi, Chiteni/July 12 (Agencies): India linük nung Khristantem anema inyakba mita reprangba meimchir temeden telok kati, taküm küm tenzükür küm tesimalang (January-June) tashi nung India kübok state 17 nung Khristantem anema inyakba tatalokba 154 liasü, ta metetdaksü.

New Delhi nung amenoka aliba telok- United Christian Forum (UCF)-i, tanga tamangba yimsütem, talisa Khristan anema inyakertem nem tangatetba tajung agütsütsü atema amalitepa inyakba Ministry tasen ka nüngdaker, ta metetdaksü.

UCF-i sangdong ka ajanga, "Yisu Khrista ministry inyakba sülen küm 2,000 ajungba nüngtem nung alima tesem balala nung aliba India nunger Khristantemi longjemer July 3

ANOGO ABEN TSÜNGREM DEN

Mapang ajak nung Tsüngrem den

"Kodang Farao anasa aru, Israel nungeri parnok aria aruba ljib nungerji angu, parnoki tsübuadok aser Kibuba dang teyari asoshi ayimten". Anitet 14:10

Sayutsüngir asem ajuruteper, kobala sarasadem Tsüngremi langzür ta jembitep. Mezüngbuba sayutsüngiri ashi, teka metonger sarasademba langzür. Tanabuba sayutsüngiri ashi, temokok agi ali nung tsükita apudaker sarasademba langzür. Tasembuba sayutsüngiri ashi, ali nung judaka mejanger sarasademba langzür. Par asem sensaksemba, tele-phone yanglur kati angashi aser ashi, 'telephone post feet lir temalen langkoshishi sozüa mapa inyakdang sarasademba langzür.' Asenoki aiben koda masüba mapang Tsüngrem bushir. Tsüngremi, asenok Pa dangi meyiptsü aser sarasademtsü asoshi tensa tia bener arutsür.

Ammang tanak nung petinu jangjar, shirangba mapang mozü bushir, tzünglu aruba ajanga anübu talem menungrar, koda masü tia nung alidang tangar teyari nüngdaker. Aiben ajak dang tongtipangtiba asenoki amadoker aser pa nungi pila oadoker. Mapang ajak nung Pai asenok meimer, yarinür. Lendong timtem mapang nung dang masü saka mapang ajak nung asenok takoksang Tsüngrem den yimjung nung lidi.

SARASADEM

Oba Tsüngrem lendong-timtem aser koda masüba mapang nung dang masü saka mapang ajak nung ne den jembia alitsü yariangma. Amen

Pope Francis-i North Korea linük semdangtsüa akok

July 12, 2021: South Korea intelligence services tongti, Park Jie-won-i, pai Pope Francis dang North Korea semdangtsü ajungshidar, ta metetdaksü.

July 6, 2021 nü South Korea nung Joella kübok Mokpo jila nung tekülem sentong ka nung adenba mapang nung Park-i iba osangji metetdakja liasü, ta North Korea (International Christian Concern)-i metetdaksü.

Tekülem sentong nung jembiba mapang nung Park Jie-won-i, Pope Francis-i North Korea semdangtsü atema pai tongti putir, Kim Hee-Jung aser

Alfred Xuereb na ajurua jembitsü, ta metetdaksüba den külemi Arogo züngsemtem danga North Korea nung yimjung atema sarasademjang, ta mepishia metetdaksü.

Taküm April ita nung Vatican nung senden ka amenba mapang nung Pope Francis-ia, pai Kim ajurutsü atema North Korea semdangtsü melunga lir, ta metetdakja liasü.

Alima nung Khristantem tamajungtiba reshikangshiba linükji North Korea lir, aser Pope Francis-i iba linük semdangra ibaji ajanga temelenshi alitsü imlar.

UCF-i metetdaksü. UCF-i tiyongtsüi ia inyakba ajanga pua aliba Khristan 84 bo chiokadokogo aser tekülem ki 29 tanaben lapokdaksüogo.

Chhattisgarh aser Jharkhand naprongla nung Khristantem anema inyakba tatalokba metsür ana-na (22) liasü, Uttar Pradesh nung 19 aser Karnataka nung 17 liasü.

Madhya Pradesh nung Khristantem anema inyakba tatalokba 15, Odisha nung 12, Maharashtra nung 9, Tamil Nadu nung trok, Punjab nunga trok, Bihar nunga trok, Andhra Pradesh nung pezü, Uttarakhand nung asem, Delhi nunga asem, Haryana nung ana, Gujarat nunga ana aser Telangana, West Bengal, Assam aser Rajasthan states nung Khristantem anema inyakba tatalokba kaka liasü.

nü küm 10 benjung (2021-30) sangdongba dak alaka India nunger Khristantem atema taküm-a kecha balaka masü," ta metetdaksü.

July 10 nü UCF sangdong ajanga ashiba agi, India tesem ajungalen Khristantem anema inyakba tatalokba 154 osang UCF indang toll-free helpline number ajanga metetdakja liasü.

India nung UCF ya denomination ajak adenba Khristan organization ka lir, aser parnoki linük nung Khristantem anema inyakba atema ola adoker.

"January ita nung Khristantem anema inyakba tatalokba timtiba- 34 liasü, iba sülen tanabuba jenjang nung June ita nung tatalokba 28 liasü; March nung tatalokba 27, April nung 26, February nung 21 aser May ita nung tatalokba 16

OLONG PAITEP # 5873

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPILEN		LANGTSÜNGLEN	
1. Yakob tetsü - (6)		2. _ _ _ gki - (3)	
4. Mezüng nisung - (4)		3. Telungpur telok ka - (2)	
6. Tasen lai kakat ka - (5)		5. Tsüngremi mezüng paktetdaktsüba - (5)	
9. Au lanu - (2)		7. Tia - (4)	
12. Tejen lai 21 buba - (11)		8. Yakob-er jabaso ka - (5)	
15. Tekolak tembar - (2)		10. Abraham tebutsü - (4)	
16. Zütsüra anepsang - (5)		11. Rebeka kinungpu - (4)	
17. Kain tenu - (4)		13. Esau tenu - (5)	
18. Hana-er jabaso - (6)		14. Tzünglu tilala aru - (4)	
		16. Jafet tebu - (3)	
		17. Teka agi kongshi - (2)	

OLONG PAITEP # 2 TELANGZÜBA

TIPILEN :		LANGTSÜNGLEN :	
2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,		1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.	



COVID-19 PANDEMIC AJANGA TAKOKSA AIKA LIAKA TAJANGZÜK TEM ASADANGER :

Merenba: Nibo mazüngba ajanga mapa aika pending aliba tan lock down mapangya ajak inyakmaogo.

Asangba : Aon tasen achir ama tan lockdown mapang sentep melapokerji KABA, DABA aser MTBA sannükertem sayutsüngiba jangratema angadarko.

Toshiba : Kinünger den kipok semteptsü mapang mangu aliba tan lock down nungang ajak ki semogo.

Polokba : Chiyungtsü tajung den chiyungli jangratema kazüli ta anogotem süitemdarni.

Alokba : Sentepa malirji, devotional mapang shitak nung UFC arurji to, tang yaang jangratema asaya ajak reprangdarnii.

Lilir : WhatsApp

AO OSHI ANGAZÜKDAK:
TANÜ ANGAZÜKTSÜBA OJANG

Kibuba
(n) pa meyong, kibur (Lord)
* Yisuji asenok taküm madak **kibuba** lir.

Kibur
(n) par indang rongsen (owner)
* Ozü ki **kibur** nisung kanga tajung ka lir.

NAI-A YA METETTER MA?

EURO ASAYAMUNG PUTIOTSÜ NUNG GOAL TIMTIBA IDAKTSÜR ALIR ASAYARTEM:

- Cristiano Ronaldo	- Portugal 14 goals (25 matches)
- Michel Platini	- France 9 goals (5 matches)
- Alan Shearer	- England 7 goals (9 matches)
- Antoine Griezmann	- France 6 goals (7 matches)
- Ruud Van Nistelrooy	- Netherlands 6 goals (8 matches)
- Patrick Kluivert	- Netherlands 6 goals (9 matches)
- Wayne Rooney	- England 6 goals (10 matches)
- Thierry Henry	- France 6 goals (11 matches)
- Zlatan Ibrahimovic	- Sweden 6 goals (13 matches)
- Nuno Gomes	- Portugal 6 goals (14 matches)

TANÜBO NAI LANGZÜANG

Q. Koba küm Malala nem National Youth Peace Prize agütsü?

A.2010 B.2012 C.2014 D.2016

=====(Taruba adok nung onoki langzüksü)

YASHI ADOK TELANGZÜBA : Maharashtra

SUDOKU # 5913 TELANGZUBA # 5912

	5			1	2			8	3	5	4	7	6	2	9	1	
9				5			8		1	7	4	3	9	2	6	5	8
	3	1	2	8	7	5		6	2	6	9	1	5	8	4	3	7
		3	5			9	2	4	9	1	6	8	2	4	3	7	5
		4				3			7	5	3	9	6	1	8	4	2
	8			9			7		4	2	8	5	3	7	1	6	9
3		8	9	7		4		2	5	9	2	6	8	3	7	1	4
	4		8	3	2	1		9	6	8	1	7	4	9	5	2	3
	7	9	1	6				8	3	4	7	2	1	5	9	8	6

OJANG LUTEP # 5458

BEAIN	:	<input type="text"/>
SENHIJ	:	<input type="text"/>
HIRS	:	<input type="text"/>
GAIMAN	:	<input type="text"/>
ELEAIBNRA	:	<input type="text"/>
ERENTEMSHI	:	<input type="text"/>
PETAT	:	<input type="text"/>
TSÜAGÜTSÜ	:	<input type="text"/>
GALAN	:	<input type="text"/>
RLI	:	<input type="text"/>

OJANG LUTEP TELANGZÜBA # 5457

TEMZÜNGI TULUR TILAR MEREPRANGER SAKA TAI MAKAR NEM TEMEDEN AGÜTSÜR

TAN HOPTA ATEMA - KOMA SÜLA ?

Q. Naga yimten tebilemtsü ya tang amai tatembang küma melatettet, ano, küm ter süi nunga koma süla ?



July 12, 2021 nü Jaipur nung Amer Fort anasa tsüngi agi Watch Tower ka kongshiba sülen SDRF team-i kümzükba maparen inyakba noksa nung angur. Iba tatalokba nung nisung 11 süogo.

UP aser Rajasthan na nung tsüngi lendong nung nisung 56 asü

New Delhi, Chiteni/July 12 (Agencies): Uttar Pradesh aser Rajasthan na nung tsüngi lendong nung nisung aika asüba sülen Ato kilonser, Narendra Modi-i mangyim jashi lemsatepba den külemi takoksa angur kibongtem nem senotsü teyari agütsütsü, ta sangdong.

July 11, 2021 aonung state ana nung tsüngi agi nisung 56 aiseta süogo; Uttar Pradesh nung nisung 38 asü aser Rajasthan nung nisung 18 süogo.

Uttar Pradesh kübok Prayagraj kija nung tsüngi lendong ajanga nisung 14 asü, Kanpur Dehat nung nisung pongu asü, Firozabad aser Kaushambhi na nung asemsem

asir Unnao aser Chitrakoot na nung nisung anana asü.

Lendong osang angashiba sülen Uttar Pradesh Chief Minister, Yogi Adityanath-i mangyim jashi lemsatepba den külemi district administrations dang lendong agi kongshiba kibongtem nem teyari agüjang ta tuyua liasü.

State sorkar otongdar kati ashiba agi, Kanpur, Pratapgarh, Agra, Varanasi aser Rae Bareilly nung nisung aika süogo.

Rajasthan nunga Jaipur, Kota, Jhalawar aser Dholpur district tem nung tsüngi lendong nung nisung 18 asü. Asürtem rongnung tanur tenet densema liasü. Tsüngi lendong nungsa tanur trok densema nisung 21

yirugo.

Jaipur nungbo tesem ka nung lanurtem timba ser nisung 11 asü. Amber Fort anasa Watch Tower ka nung tsüngi yaloktsüba lendong nung parnok 11 asü.

Rajasthan Chief Minister Ashok Gehlot-i mangyim jashi lemsatepba den külemi lendong nung asür kibong shia nem sen lakh pongungu agütsütsü, ta sangdong.

"Rajasthan tesem aika nung tsüngi ajanga nisung aika süogo. Nisung aika asüba atema jashia bilemer. Asür kibongtem den ni mangyim jashi lemsateper: PM @narendramodi," ta Prime Minister's Office (PMO)-i twitter ajanga metetdaksü.

PETA-i Centre sorkar dang nashi tepsetba nokdangtsü mepishi

Chennai, July 12 (Agencies): July 13 nü Cow Appreciation Day amongtsü lia Hombarnü People for the Ethical Treatment of Animals (PETA) India-i shidi ka ajanga Council for Leather Exports (CLE) Chair, Sanjay Leekha dang shiküp atema nashi aser jang alepba anentsü atema organization nung züngsemtem dang mepishiang, ta metetdaksü.

CLE ya Union ministry of commerce & industry kübok inyaker.

PETA India-i, shiruru shiküp melena vegan leather amshiba ajanga iba ya akoktsü aser taküm

alitsü atema maongka tasen aika angutsü, ta metetdaksü.

Tanü putu nungbo shiruru shiküp melen somomo, tsükmenatsü, apples, jiru aser narikol ama süngianglijangtem agi süngolio agi vegan leather yangluteter, ta parnokisa metetdaksü.

PETA India-i, alima nung vegan leather ya kanga nüngtugu kümdar aser Infinium Global Research-i ashiba agi 2025 küm tashi nungbo iba market US dollar billion 90 ajungtsü, ta ashi.

PETA India-isa, Demetra densema alima nung nüngtugu company aikati vegan leather

amshir, ta metetdaksü.

"Tarutsü nung Vegan leather ya kanga bulua amshitsü, aser onoki India tesülen atsüngzüka melidaktsüner. Nisung aikati süngolio agi yangluba shiküp kanga sabua bushiba Market reports ajanga metetdaksüogo," ta PETA India CEO, Dr Manilal Valliyate-i metetdaksü.

"CLE züngsemtemi süngolio aser tanga materials ajanga leather yanglu tenzüksüla; ibaji ajanga aluyimertem nem tashi agütsütsü, shiruru taküm melalutsü aser meimchir taküm den tzi-mopung kümzüksü," ta paisa metetdaksü.

India nung nisung 37,154 dak Coronavirus putet aser 724 asü

New Delhi, July 12 (Agencies): India linük nung ano nisung 37,154 dak coronavirus putet aser iba tashidak agi nisung 724 süogo, ta Hombarne Union health ministry-i metetdaksü.

Tesüiba ghonda 24 tsüngda coronavirus agi shiranger 39,649 anepogo, aser ibaji densemabo linük nung iba tashidak agi shiranger crore 3 anepogo.

Tang tashi nung linük nung nisung ajak agi 3,08,74,376 dak coronavirus putetogo, iba tashidak agi shiranger 3,00,14,713 anepogo aser asür ajak senteper 4,08,764 jungogo, ta Union Health Ministry-i metetdaksü.

Tang anogo shia coronavirus positive putetba shilem 2.59 dang

kümogo aser teshirangdakpur shilem 1.46 dang kümogo.

India nung coronavirus wave tasembuba tsübutepba mapang nung Covid Vaccination kanga ajema kümogo. June 21-27 tsüngda anogo shia vaccine dose lakh 61 shi agüja liasü saka June 28-July 4 tsüngda nungbo anogo shia vaccine dose lakh 41 dang agütsü.

Ano July 5 nungi July 11 tashi nunga anogo shia coronavirus vaccine dose 34.32 dang agütsü. Hombarnü Health Ministry-i sangdong ka ajanga, states, UTs aser nija hospital ket nung vaccine dose crore 1.54 dak tema anünga lir, ta metetdaksü.

Tang tashi nung linük nung coronavirus vaccine dose crore 37.73 agütsüogo.



July 12, 2021 nü Dharamshala (Himachal Pradesh) nung tzünglu sashia aruba ajanga ki ka raksaa aliba noksa nung angur.

July 19 nungi tzüngluruwa mongpu Parliament tenzüksü: Om Birla

New Delhi, July 12 (Agencies): July 19, 2021 nungi tzüngluruwa mongpu Parliament senden tenzüksü, aser iba mapang nung coronavirus dak sendakba tetuyuba ajak benshitsü, ta Hombarnü Lok Sabha Speaker, Om Birla-i metetdaksü.

Pai ashiba agi, coronavirus vaccine magi alir MP ajak dang Parliament metenzükdangsa RT-PCR test tama agiang ta tuyutsü.

Parliament complex nung osangbenertem den jembidang Om Birla-i, tang tashi nung MP 323-i vaccine dose anaprongla agiogo, aser MP 23-ibo medical kuli kar nung ajemdaker mezüngbuba dose-a tang tashi

magi, ta metetdaksü. Birla-isa, Rajya Sabha aser Lok Sabha naprongla nung anogo shia anüngdang 11:00 ako nungi külemi senden tenzüksü, ta metetdaksü.

July 19 nü Parliament tenzüksüba sülen Independence Day matongdangsa August 13 nü senden tembangtsü. India nung coronavirus wara prok tenzüksüba sülen Parliament session asem atsülanga liasü aser asükwa mongpu Parliament bo thinena liasü.

Teti agia tzüngluruwa mongpu ya July ita nung tenzüker, ajüsüaka coronavirus wara ajanga yakümba September ita nung ang tenzüka liasü.



Hyderabad, July 12, 2021: India nung petrol aser diesel totzü jenjang maneni atuba anema Hombarnü Hyderabad nung Congress Party züngsemtemi longkak aitiba noksa nung angur.

Goa nüburtemi terenlok aginer: Kejriwal

New Delhi, July 12 (Agencies): Sangküm Goa nung Assembly elections agitsü lia Hombarnü Delhi Chief Minister aser Aam Aadmi Party (AAP) tongti lenir, Arvind Kejriwal-i, Goa nung yimten melenshitsü nüngdaker, kechiyong state nung yimtenren party tem kati ka arishiteper aser MLA tem sen agi yokteper, ta metetdaksü.

jelia Hombarnü Kejriwal-i twitter ajanga, "Goa nüburtemi temelenshi aginer. Party temi MLA tem alizükba aser ayokba agi lakogo. Tesempatsü politics agi lakogo. Goa-i terenlok aginer. Senotsü peria lir saka ochishir peria mali. Goa-i ochi politics aginer. Asüng Goa nung ajurutepti," ta metetdaksü.

Sangküm Goa Assembly elections nung AAP-ia tokteptsü.

July 13 nü Goa semdangtsü



Cuba nung chiyongtsü agi anüngba aser chiyongtsü nung jenjang tali temlokba anema nüburtemi longkak aitba mapang lir. Aser Cuba nung nüburtem busema Little Havana, Miami nung Versailles Cuban restaurant anasa nüburtemi Cuba indang nisan amer yimtung nung jajaba noksa nung angur.

China-i Afghanistan nung mepetmesü adokba US dak tongloktsü

Beijing, Chiteni/July 12 (Agencies): Afghanistan nung tawa mepetmesü tulu adokba dak sendakba nung China-i US dak tai tongloktsüogo. US-i Afghanistan nungi sepaitem aritepa anina security tensa kanga mejungi kümdaktsüba ajanga Afghan nungertem mepetmesü tulu nung lir ta shia China-i US dak tai tongloktsüogo.

"US-i nüjiso aser democracy tenüng nung tangar nongshir aser alima tesem balala nung yimsüsüba melenshitsütsü meranger. Iba ajanga rara, kiralongrar, refugee aser tanga mepetmesü aika adokogo," ta China foreign ministry otongdar Wang Wenbin-i ashi. "US-i parnok khuret aser tinyaktsü sentoka toktsür Afghanistan nungi aritepa atsüingniba ajanga Afghanistan nunger aser kidanger linüktem nung

mepetmesü adokogo." Pakistan nung amenoker aliba News International sangdong ka ajanga ashiba agi, Chinese foreign minister Wang Yi-i, Russia, India, Pakistan aser tanga Central Asia linüktem nungi foreign minister tem den taruba hopta Shanghai Cooperation Organisation senden nung Afghan security tensa sensak asemtsü renema lir.

Linük mepetmesü tulu nung aliba mapang Afghan ketdangsürtemi Deobarnü, Kabul nung airport tongtibangba nung rocket tem nokdangtsü atema anti-missile system amenokba sangdongogo.

Afghan security forces otongdar Ajmal Omar Shinwari-i, iba anti-missile system ya bendanger tembar kari agütsü ta ashi. "Iba technology ya amshitsü temela masü. Tang atemabo

bendanger tembartemi iba system achayangdar aser kasa mapa nung iba system amshitsü atema onoka angazükdar," ta pai ashi.

Afghanistan nung Taliban puri tesem balala atsüinga aotsü merangba mapang ka nung Pakistan-a civil war adoker iba ajanga timtem bener arutsüra ibaji nokdangtsü atema renemdar, ta Pakistan army otongdar kati ashi. Paisa, Islamabad ya Afghan yimjung inyakyim nung "guarantor" ka masü saka teyari agütsür ka dang lir, ta ashi.

Maneni pai, Afghanistan nung tensa Pakistan-i kanga junga asadangdar aser iba ya azüoktsü atema jenjang agidar, ta ashi. Arrtsü nung security akangshioago aser arrtsü nung atsü shilem 90 bo atsübangogo, ta pai ashiba den Afghan nunger refugee tem aika Pakistan leni arutsü ta tsüba bilemer, ta shisem.

Jacob Zuma tepuokdak ayuba mechi tensa tamajungba akumer

Johannesburg, Chiteni/July 12 (Agencies): Taoba Tir Jacob Zuma tepuokdak ayuba sülen South Africa indang province ana nung rongrong adoka pa busemer temi lenmangtem nokdang aser dokan nung ayuar.

Nisung 62 shi puogo, ta South Africa police ajanga Deobarnü ashi. Court mezüingmeshiba atema Zuma ya taoba hopta nungi ita 15 atema tepuokdak yua lir.

Arishi küm 79 tain Zuma ya 2009 nungi 2018 tashi South Africa tir inyakba mapang ochimashi mapa inyakba tai tonglokja sorkari bushisüngdangba nung kuli agütsütsü atema court ka ajanga totuyuba agütsüba nung manidakba atema tepuokdak ayutsü obendang agütsü.

Estcourt Correctional Centre nungi pa chioiktsü atema jembia saka Hokulbarnü regional court kati magizük. Pai ano Hombarnü linük nung tematiba court, Constitutional Court nung ken o benoka jembitsü lir.

Zuma busemertemi yimti-yimtung nung adenshia ki-o-jen raksaja nüburt nem timtem

agütsüba ya taoba hopta par ki aliba KwaZulu-Natal province nung tenzüker aser hopta tatemi Gauteng province lenia prokshia ao, kong South Africa indang yimti tulutiba, Johannesburg lir.

Johannesburg kübok Alexandra aser Bramley nung nisung noklang aika adenshia dokan tem tashiyim agi kakpoka auya aser rongtsü, ta police Major General Mathapelo Peters-i sangdong ka nung ashi. Rongdoker aliba dokan ka nungi arishi küm 40 tain tebur ka temang ngutet aser police temi bushisüngdangba mapang lir, ta pai ashi.

Iba den külemi police temi auyartem aputsü merangba mapang police asem yiru aser kabo mozüki nung lir, ta sangdong ajangasa ashi.

Johannesburg aser KwaZulu-Natal kübok tzükum nung aliba Durban yimti sendaktepba N3 highway ya ghonda aika mokdanga liasü aser yangji Zuma pua aliba Estcourt prison leni aoba lenmang densema liasü, ta osang ka ajanga ashi.

Durban northwest tsütsü

kilometer 150 shi pilar Mooi River temeket nung truck 23 shi nung mi senlokja rongdoktsü, ta ashi.

COVID-19 mechi tenokdangba agütsüba nung rangloker Tir Cyril Ramaphosa-i Deobarnü jembiba mapang nüburtem dang nüburtem nem timtem magütsütsü aser rongsenketsüing meraktsütsüsa yinya tajung nung longkak aittsü ajungshia liasü.

"Nüburtem amokmerener aser jashidaktsür, aser karbo yirutsüogo. Nisung karbo sür alitsü," ta Ramaphosa-i ashi.

Nüburtem dang süngjema alitsü ajungshiaka Durban temeket nungbo Deobar nikonddang tashi ki-o-jen kakpoka rakzükraktemba liasü.

Province anaprong nung nübu tali kumdaktsür, ta police-i ashi aser Zuma busemer dang social media nung azüdokshitsü ajungmesora timtem alitsü, ta shioago.

Ki-o-jen kakpoka rakzükraktemba nungi jenbuttsü mechi Kwa-Zulu Natal aser Gauteng nung Hombarnü dokan tem shibangtsü, ta district ketdangsürtemi ashi.

Nepal SC-i House tanaben amenokshitsü; Deuba PM shimtsü tuyu

Kathmandu, Chiteni/July 12 (Agencies): Ita pongu tsüingda tanabenbuba Nepal Supreme Court-i Hombarnü loksar aliba House of Representatives amenokshitsü tetuyuba agütsüogo.

Iba obendang agütsüba ya Ato Kilonser KP Sharma Oli asoshi tetsükdaktsü tulu ka lir. House nung trust vote makokba sülen pa lenisüba nung minority sorkar ka inyaksangshia liasü.

Obendanger pongu agi kümtetba Supreme Court Constitutional Bench kati Hombarnü ano anogo ana tsüingda Nepali Congress tir Sher Bahadur Deuba nem Ato Kilonser mapa belenzüktsütsü tetuyuba agütsüogo.

Chief Justice Cholendra Shumsher Rana-i aniba bench-i iba ken o taoba hopta tembanga angadangogo. Bench nung obendanger tejen Dipak Kumar Karki, Mira Khadka, Ishwar Prasad Khatiwada aser Dr Ananda Mohan Bhattarai nunger densema liasü.

Ato Kilonser Oli tetuyuba nung Tir Bidya Devi Bhandari-i ita pongu tsüingda tanabenbuba May 22 nü züingsem 275 agi kümtetba lower house loksatsü atema tetuyuba agütsü aser November 12 aser 19 nü election agitsü sangdonga liasü.

Taoba hopta Election Commission-i, election agitsü magitsü mejangjaka mid-term elections mapanglen sangdonga liasü. Tiri House loksatsüba anema Nepali Congress-i aniba opposition alliance densema kija aser lokti balalai okadak ken o 30 benoka liasü.

Nepal Communist Party (NCP) yongtsü nung tashi toktepba teyalong nung Ato Kilonser Oli tetuyuba nung taoba küm December 20 nü tir Bhandari house loksaja April 30 aser May 10 nü election agitsü sangdongo. February 23 nü SC-i House of Representatives amenokshitsü aser iba ajanga PM Oli asoshi tetsükdaktsü adok, shiba snap polls atema renemshia liasü.

Haiti Tir Moise tepsettsü tasa yanglur tekolakba puogo



Port-au-Prince, Chiteni/July 12 (Agencies): Tir Jovenel Moise tepsetba maparen nung tasa yanglur tekolakba südi ta temolung melemi alir ka Haiti police temi puogo.

Ketdangsürtemi ashiba agi, parnoki US kübok Florida state nung alir Haiti nunger ka puogo, shibai tir menden nungi agientsü aser melentsü atema bendanger sepai nem sen talang agütsür yoka liasü.

Bodhbarnep Port-au-Prince nung Moise ya par kidang lia khaset, aser pa khaseter rongnung Colombia nunger 26 aser Haitian-American nunger ana lir, ta Haiti ketdangsürtemi ashir.

National Police Chief Leon Charles-i Deobarnü osangbener senden ka nung ashiba agi, pua alisang arishi küm 63 tain Christian Emmanuel Sanon ya June ita tetenzüklen nija meyong jet (tayimtsü tila) ka nung sen talang agüja aliba security guard te dener Haiti-i arua aser tir melennüa liasü.

Pai Florida nung amenoka aliba nija meyong Venezuelan security firm ka ajanga Colombia nunger sepai nem nisung tepsettsü atema taa agütsü, ta tai tongloktsür.

Iba ken o nung apurtem rongnung doctor sang ya United States nung alir Haiti nunger

tasembuba aser nisung 21 buba alitsü.

Sanon nükjidong ya Charles-i rasaa mashi saka ibai yimtenren tsütsü nungi liasü, ta ashi.

"Lendong agütsürtem indang sentong mezüingbuba ya Emmanuel Sanon kumzüka ayutsüba liasü, saka khen lir sentong melenshi," ta Charles-i ashi.

Haiti nung Sanon'er kidang nungi US Drug Enforcement Administration indang logo aliba korang ka, injang box 20, prangbong oset, Dominican Republic nungi automobile licence plate pezü, gari ana aser mejangjaba nisung den osangtsüsang agitepba tem ngutet, ta Charles-i ashi.

Moise tepsetba ken o nung Haiti sepaitemi Colombia nunger nisung 18 aser Sanon densema Haitian-American nunger nisung asem pua lir, ta Charles-i ashi. Colombia nunger nisung pongu bushiba mapang lir aser asem tepsetogo, ta pai ashi.

Moise tepset ta temolung melemi alirtemi bushisüngdang dang parnok ya Moise tepsettsü atema masü saka aputsü atema aoba lir ta ashi, ta Miami Herald aser iba ken o junga meteta alirtemi Deobarnü shia liasü.

Zunheboto District nung Oxygen concentrator tem agütsü



Zunheboto, Chiteni/July 12, 2021: Deputy Commissioner, C Peter Lichamo-i Zunheboto District atema Oxygen concentrator tem Dy. CMO, Dr Akaho Sema nem agütsüba mapang tangokba noksa ka yangi angur.

Zunheboto, Chiteni/July 12, 2021 (TYO): Hombarnü, agütsüogo, ta sangdong ka ajanga metetdaksü. United Way India, Mumbaion Deputy Commissioner, nungi Zunheboto district nem 10 liter-oxygen concentrator 16

maparen ya district indang sub division tem atema kanga tajangzük asütsü.

PHCs aser CHCs nung shirangertem anepalutsü asoshi oxygen concentrator yagi kanga yaritsü, ta osangbener den jembiba mapang, DC aser Dy. CMO, Dr Akaho Sema nati metetdaksü.

Nisung takim ka kümzüksü asoshi item oxygen concentrator yagi tongti shilem agitsü, ta Lichamo-i shisem aser iba tentet (United Way India, Mumbaion) danga pai pelaba lemsatep.

Global United Way network den United Way India longjemer inyaker aser Global United Way network ya alima nung tajangzük magii pei sasa inyaksangshiba nija tentet rongnung tulutiba asütsü.


Maneni, item oxygen concentrator ajak DC Zunheboto ajanga Dy. CMO ket nung agüja liasü, ta kasa sangdong nung shia lir.

Akshay indang 'Bell Bottom' August nung sayatsü

New Delhi, Chiteni/July 12, 2021 (Agencies): Bollywood superstar Akshay Kumar indang kanga dang yongya ataba film - Bell Bottom sayatsü atema aikati jembia arudar. Ajisüaka, linük tesem ajunga nung Covid-19 wara süshia maoba ajanga cinema hall tem tanaben lapoktsü asoshi tebilemsü tulu adoker.

Mezüngbo Bell Bottom film July 27, 2021 nü sayatsü renem, saka tensa asadanger sülen film yanglurtemi August ita iba film theatre nung sayatsü lemtet. ETimes sangdong ka ajanga angazükba agi, Bell Bottom film ya theatre nungang sayatsü akok.

Iba film dak sendakba nung jembiba mapang, Rajasthan nungi distributor aser multiplex kibur, Raj Bansal-i, "Tang India nung Covid tensa asadanga, cinema/theatre tem July 27 tashi nungbo lapoktsü ama nibo mebilemer, ibayongji August 13 nü theatre nung 'Bell Bottom' sayatsü akok," ta ashi.



lockdown sülen film maparen tenzükshiba rongnung mezüng liasü. Kasa mapang (lockdown sülen), film tangoktsü atema India nungi bendangleni aor film team rongnung Akshay Kumar aser film team mezüng asütsü.

Taoba küm September ita Glasgow, Scotland nung iba film tangokba mapang, set nung film tangokba noksatem social media

sabang nung prokshi aser fans temi Akshay indang film repringtsü asoshi yongyaba lemsatepogo.


Iba spy thriller film nung, Akshay dak alaka, Huma Qureshi, Lara Dutta aser Vani Kapoor nungeri tongti shilem agir aser Ranjit Tewari-i direct süogo.

Pooja Entertainment den Emmay Entertainment longjemer 'Bellbottom' film sayatsü. Vashu Bhagnani, Jacky Bhagnani, Deepshikha Deshmukh, Monisha Advani, Madhu Bhojwani aser Nikkhil Advani nungeri iba film yangluogo.



Tuensang, Chiteni/July 12, 2021: Deobarnü (11.07.2021) District Administration aser Medical Department longjemer Tuensang Town Hall nung Vaccination Mela ayonga agiba mapang tangokba noksa ka yangi angur. Iba sentong nung SDO (C), Tuensang, Shelley Katiry-i, telok dang Covid-19 vaccine indang tajangzük aser tongtibangtem tongmelang agi metetdaksü.

MULUNG NEN O



ASÜR IMCHINGANGBA PONGEN (LONGJANG)
22-01-1937 ~ 27-06-2021

Onoki teti meimba Obala, mapang tatsüka shirangdang aser pa teti tatem makaba limai onok toktsür aodang, Chumukedima Ao Baptist Arogo, lokti balala, kiyongertem, kija aser kibong, shirnokisa sarasadem, rongsen aser nübo agi ozü den yaritepogo, nenok ajak dang kanga pelaba iba sangdong ajanga lemsateper.

Nenek mapa tajung asoshi Tsüngremi maneni moajangma.
~ Temeim Kinungtsü, Jala-Jabaso & Kinungertem.

OFFICE OF THE UNGER KOSASANGER PUTU MENDEN (Village Council)

P.O. Chuchuyimlang B.P.O- Unger. Pin- 798614
Dist-Mokokchung : Nagaland

TEPELA LEMSATEPER

Tanü alima ajunga nung mapang talangka (Covid-19) agi meimchir tulu tila kecha tebandang makai timtemtepba mapang ka nung ozü lunir tajung wabong Imnatiba Hon'ble MLA & Advisor. Industries & Commerce, Labour & Employment Skill Development and Entrepreneurship Government of Nagaland yimtsüng telong nung kanga dang nungdak-a aliba koba OXYGEN CONCENTRATOR tajung ka agütsüogo, iba asoshi yimi nubur ajak tenüng nung Unger Kosasanger Putu Menden ajanga kangasa pelaba lemsateper aser mapa tajung asoshi tenüng tali asanger.

Teyanglur Tsüngremi Par kibong aser pa wadang tali maojangma.

Sd/-
T. Tali Imsong
Chairman, Unger Vilalge Council.

PELABA METETDAKTSÜR

Morongial Arogo, Jorhat Dist. Assam nung Associate Pastor (Women) ki yangludang kija, kibong, lokti, shirnokisa sarasadem den rongsen, nübo tenla jenti agi yariogo, ajak dang kanga pelaba metetdaksür.

Nenek ajak dangi tsüngdong arua tepela melemsateptetba atema kanga sasa-a bilemer. Saka nenok mapa tajungtem asoshi asen teyanglur Tsüngremi nenok ajak talubusa moajangma ta ozü arogapur sarasadem.

Sd/- Alemla
Secretary,
MABA, Assam

Sd/- Watila ENSA
Associate Pastor Women,
MABA, Assam

Pfutsero ADC ajanga metetdaksür

Pfutsero, Chiteni/July 12, 2021 (TYO): Additional Deputy Commissioner, Pfutsero-i sangdong ka ajanga, iba Sub-division nung COVID-19 wara prokba nokdangtsü atema, Pfutsero Sub-Division nung tang anidakba lockdown meratem den külemi July 11, 2021 nungi tenzüka July 17, July 2021 tashi talenba kar salatsü, maparentem lapoktsü aser tetuyuba talila kar nung anidaktsü asoshi metetdaksür.

1. Nüngdakba osettsüset ayokba dokan/shishilembaba tesem tem anepdang 6:00 ako nungi nikongdang 4:00 ako tashi lapoktsü melar. Takeaways, home delivery aser tanga e-commerce service tem anogoshi lapoktsü/achaayangtsü asoshi melatsü.
2. Tetoktepba asayamung dak alaka, saisapongtem agütsütsü, ta kasa sangdong (outdoor sports) melatsü. Iba

dak sendakba nung, nisung 100 dak tema adenshitsu memelatsü aser ajaki COVID-19 temzüng den SOPs nung teti anidaktsüla.

3. Covid-19 tashidak malirtem aser COVID-19 Vaccinne dose anaprongla agir alirtem; aser COVID-19 tetuyuba nung anidaka district telungtet nung senzüsensongtsü asoshi melatsü.

4. Bus service, intra aser inter-district Taxi service, two-wheeler taxi service aser two wheeler nung nisung ana mener senzüba maneni nokdangtsü.

Anungji, tekalen agüja aliba tetuyubatem nung nisung kari danga aibelenra, Indian Penal Code 1860 indang section 188 aser Disaster Management Act 2005 indang provision agi melaba ama temerenshi tapet agütsütsü, ta kasa sangdong nung shia lir.

UEFA Euro 2020 Championship Italy-i kokogo



London kübok Wembley stadium nung Euro 2020 soccer championship final nung England team akokba sülen Italy nunger asayartem pelatepba noksa nung angur.

Chiteni/July 12, 2021 (Agencies): 1968 kum sülen tang mezüngbuba Italy-i European Championship kokogo. Deobarnü Wembley nung final asaya goal 1-1 agütsür tebangba sülen penalty metsütepba mapang Italy goal keeper Gianluigi Donnarumma-i England nunger asayartemi metsüba ball ana nokdanga goal 3-2 agi asaya akok.

Marcus Rashford-i metsüba ball post nung ondaker adokba sülen Donnarumma-i, Jadon Sancho

asere Bukayo Saka nati metsüba ball nokdanga liasü. Kasa mapang nung Italy nunger asayar Bernardeschi, Leonardo Bonucci aser Domenico Berardi nungeri goal idaktsü.

Asaya tenzüker minute anabuba nung Luke Shaw-i England atema mezüngbuba goal idaktsü, ajisüak Italy team-i tanem tanemi nongshia asaya aser asaya tanabuba shilem tenzüker minute 67buba nung Bonucci-i goal ka idakja goal kasasa aküm.

1976 kum Czechoslovakia-

i penalty nung West Germany akokba sülen taküm mezüngbuba Euro final nung penalty asayaogo aser Italy atema 2000 aser 2012 kum final asaya nung tamakok anguba sülen iba takok ya anisüngzük asütsü.

Asaya mapa timba Italy-i amokbanger asaya aser England team atema tashishitsü kecha mali, kechiyong parnoki asaya tenzüker goal idaktsü atema maongka yanglua asayaba sülenbo atsüngzüka asaya liasü.

Wembley nung asaya repranger 67,000 atema iba asaya makokba ya temulung raksatsüka liasü, kechiyong kum 55 tejakdang World Cup akokba sülen England team-i tang tashi nung tongtibang asayamung ka danga koka mali aser taküma iba maoangka magitet.

Asaya nung Kieran Trippier-i agütsüba ball ka Shaw-i minute anabuba nung ikdakja tenzüker ajisüaka iba sülen parnoki Donnarumma nem kecha timtem magütsü asaya.

Kasaji England keeper Jordan Pickford nema Italy nunger asayartemi kecha timtem magütsü aser Federico Chiesa-i goal tezüluni ball ka metsüdokba aser Ciro Immobile-i metsüba ball ka defender-i nokdanga dak alaka asaya mezüngbuba shilem nung goal idaktsütsü maongka mongutet.

England team-i defence kanga junga nokdak aser ball nongpoka bener aitsü atema Italy team nem maongka magütsü aser ibayongji ball talang nungiang metsütsüsa aküm aser yamaji centre back Bonucci-i goal nungi meter 35 pilar ball talangkati metsüdok.

Asaya tanabuba shilem tenzüker minute 57 nung Lorenzo Insigne-i metsüba ball ka Pickford-i kanga junga nokdang aser Italy team-i goal idaktsütsü atema nongshi tenzüker.

Goal idaktsü merangdanga asayaba sülen Andrea Belotti-i tongoktsüba ball ka Pickford-i teptokba Bonucci-i idakja goal kasasa aküm.

Atakzüka aliba asaya mapang tembangba sülen mapang apuloktsü asayaba mapanga telok anapronglai goal midaktsütet aser penalty metsütepba mapang England nunger asayartemi goal midaktsüteti Italy nem takok agütsü.

DDCA-i asayartem tenüng züngoksemtsü metetdaktsü

Dimapur, Chiteni/July 12 (TYO): Dimapur District cricket Association-i sangdong ka ajanga Dimapur district kübok aliba cricket asayar tejangrartem dang parnok tenüng züngoksemtsü metetdaktsüogo.

2021-22 season atema trails asoshi NCA nem temsüa aliba asayartem tenüng agütsütsü asoshi under 16, u19 & U23

tebur aser Senior tebur, Under 19, U23 aser senior tetsür asayartem dang July 14 nü 12:00 ako tashi nung parnok tenüng züngoksemtsü atema metetdaktsüogo.

Tenüng züngoksemtsü atema nüngdakba kuli kakettem:

1. AADHAAR
2. Birth Certificate
3. Pan card

4. Address proof (passport/ voters i.d)

5. Vaccination certificate (arishi kum 18 temapur).

Tenüng züngoksemtsü atema asayartem dang DDCA züngsem C.K.Mech (8415869357) aser Imti Aier (9612900161) na den tongteprateptsü asoshi DDCA tir Choba Lotha-i metetdaktsüogo.

DYRS-i Virtual Football Skill tetoktepba ayongzüksü

Kohima, Chiteni/July 12 (TYO): Department of Youth Resources and Sports (DYRS)-i, tetsür aser tebur naprongla atema virtual football skill tetoktepba ka ayongzüksü. July 1 nü nungi August 14, 2021 nü tashi India nüjiso ngur kum 75 (Azadi Ka Amrit Mahotsav) ajungba nüngtem nung sentong balala ayongzüka agiba nung shilem ka ama iba tetoktepba ayongzüksü.

DYRS directorate sangdong ka ajanga ashiba agi, online virtual tetoktepba ya sempet tajung aketba football asayar aser free styler tem parnok sempet sayutsü atema sabang lapoktsütsü nükjidong nung ayongzüker. Iba tetoktepba ya ita aika asayatsü maongka mongui aliba asayartem atema

maongka aser sabang tajung ka asütsü.

Tetsür aser tebur naprongla tetoktepba nung takok angur nem senpet sen 10,000, tanabuba jenjang angur nem 7,000 aser tasembuba nem 5,000 agütsütsü. Tanga sempettem rongnung YouTube nung video timtiba repringba asayar aser asayartem rongnung tabosusang aser tanutsüla nem senpet sen 1000 agütsütsü.

Video ya July 11 nü nungi benden tenzüker aser video agütsütsü asoshi tatembangbuba anogoji August 10 asütsü. Tetoktepba nung takok angurtem indang osang August 15 nü sangdongtsü ta department-i metetdaktsü.


Tetoktepba nung shilem agütsü atema asayartemi parnok

indang tasa aser skill tem tangoka video yanglur DYRSvirtual@gmail.com mesera whatsapp (9916580774) nung pei tenüng, arishi kum aser contact tejangja yoktsü nüngdaker.

Iba tetoktepba nung Nagaland nung alirtemi dang shilem agitettsü. Osang ajangsa video tem ya Dept. of Youth Resources and Sports Nagaland' indang YouTube channel nung upload sütsütsü aser tetokteper shi indang video minute anana asütsü.

Tetoktepba ya football coach aser asayar tejentemi tentetba board kati, techniques, execution, skills, accuracy, tricks aser creativity dak ajemdaker tendangtsü, ta department-isa metetdaktsü.

ATP Finals atema Novak Djokovic qualify süogo



kanga kara qualify asüba atema kanga pelar," ta Djokovic-i ashi, shiba ATP finals 14buba asayatsü lir.

"Italy nunger fan temi tennis kanga sapur anungji asayamung kanga junga ayongzüka jangradema asayatsü imlar," ta Serbia nunger asayari ashi. Federer-i iba asayamung trokben koka lir aser tang Djokovic-i iba alizung tongtettsü atema meranga asayatsü imlar.

Arishi kum 34 tain asayar shiba taküm kum otsütsütsüsa tenetbenbuba temaba jenjang nung tembangtsü imlar, pai taküm asaya 37 nungi 34 bo kokogo.

2019 kum ATP Finals koker alisang Greek nunger asayar Stefanos Tsitsipas iba asayamung atema qualify asütsü asoshi tanabuba jenjang nung lir aser pa sülen Berrettini lir.

ATP Tour season asayatsü atema ano ita pezü anunga lia Rafa Nadal, Daniil Medvedev, Andrey Rublev, Alexander Zverev aser Jannik Sinner nunger ajak Top 12 nung lir.

Chiteni/July 12, 2021 (Agencies): Deobarnü Wimbledon akokba sülen Novak Djokovic ya taküm ATP Finals atema qualify asürtem rongnung mezüngbuba asayar kumogo. Taküm Wimbledon akokba sülen pai Roger Federer aser Rafa Nadal na den kasa Grand Slam 20 koktetogo.

Final asaya nung Djokovic-i 6-7(4) 6-4 6-4 6-3 agi Italy nunger asayar Matteo Berrettini kokogo aser Turin nung November 14 nungi 21 tashi asayatsü aliba ATP Finals atema qualify süogo.

"Turin nung asayatsü atema

BILEMDANGANG

"Kibok nung tesayuba melira lokti tejakleni maotsü."